

Umno Perlu Lakukan Peremajaan, Penjenamaan Semula **mStar Online**

Disember 2, 2011

Oleh SUSAN ALBERT KASSIM

KUALA LUMPUR: Pergerakan Puteri Umno menekankan bahawa parti itu perlu melakukan Peremajaan dan Penjenamaan semula dari semua peringkat dalam usaha untuk memenangi hati generasi muda.

Exco Pergerakan Puteri Umno, Wan Salwati Abdullah berkata, generasi muda adalah oksigen bagi parti ini untuk meneruskan kehidupan yang penuh mencabar.

"Mereka turut menjadi penentu pola pembentukan pemerintahan negara pada masa hadapan. Maka idea dan pandangan mereka perlu diambil kira dan diketengahkan," katanya ketika membahaskan ucapan dasar Presiden pada Perhimpunan Agung Umno di sini, Jumaat.

Beliau berkata, berdasarkan analisa oleh Suruhanjaya Pilihan Raya (SPR) sehingga suku tahun kedua 2011, daripada 12, 497,877 pengundi secara keseluruhnya, lebih lima juta pengundi muda telah berdaftar.

"Namun begitu, lebih tiga juta orang dari kelompok generasi muda masih belum mendaftar sebagai pengundi. Sekiranya golongan ini menunaikan tanggungjawab sebagai warganegara maka pada hari ini kita akan mempunyai lebih lapan juta pengundi muda," katanya.

Sehubungan itu, beliau mencadangkan agar Umno mengguna pakai prinsip pengurusan Blue Ocean Strategy yang menekankan tindakan secara berkesan dan melaksanakan proses Reduce, Create, Raise and Eliminate.

Jelasnya, penggunaan prinsip itu membolehkan Umno menilai perkara-perkara atau program yang wajib diperkenalkan.

"Zaman menghimpun puluhan ribu hadirin di padang untuk menyambut ketibaan pemimpin sudah berakhir. Zaman sekarang adalah zaman menilai pemimpin dari dekat dan menerima pemimpin yang menjawab twitter dan facebook," katanya.

Hakcipta Terpelihara © 1995-2011 Star Publications (Malaysia) Bhd

Source:

http://mstar.com.my/berita/cerita.asp?file=/2011/12/2/mstar_berita/20111202142923&sec=mstar_berita